

開放文學 – 歷代筆記 – 世說新語  
傷逝第□七

1 王仲宣好驢鳴，既葬，文帝臨其喪，顧語同游曰：「王好驢鳴，可各作一聲以送之。」赴客皆一作驢鳴。 2 王濬沖為尚書令，著公服，乘輅車，經黃公酒壚下過。顧謂後車客：「吾昔與嵇叔夜、阮嗣宗共酣飲於此壚。竹林之游，亦預其末。自嵇生夭、阮公亡以來，便為時所羈縲。今日視此雖近，邈若山河。」

3 孫子荆以有才，少所推服，唯雅敬王武子。武子喪時，名士無不至者。子荆後來，臨屍慟哭，賓客莫不垂涕。哭畢，向靈牀曰：「卿常好我作驢鳴，今我為卿作。」體似真聲，賓客皆笑。孫舉頭曰：「使君輩存，令此人死！」

4 王戎喪兒萬子，山簡往省之，王悲不自勝。簡曰：「孩抱中物，何至於此？」王曰：「聖人忘情，最下不及情。情之所鍾，正在我輩。」簡服其言，更為之慟。

5 有人哭和長輿曰：「峨峨若千丈松崩。」

6 衛洗馬以永嘉六年喪，謝鯤哭之，感動路人。咸和中，丞相王公教曰：「衛洗馬當改葬。此君風流名士，海內所瞻，可修薄祭，以敦舊好。」

7 顧彥先平生好琴，及喪，家人常以琴置靈牀上。張季鷹往哭之，不勝其慟，遂徑上牀，鼓琴作數曲，竟，撫琴曰：「顧彥先頗復賞此不？」因又大慟，遂不執孝子手而出。

8 庾亮兒遭蘇峻難遇害。諸葛道明女為庾兒婦，既寡，將改適，與亮書及之。亮答曰：「賢女尚少，故其宜也。感念亡兒，若在初沒。」

9 庾文康亡，何揚州臨葬，云：「埋玉樹著土中，使人情何能已已！」

10 王長史病篤，寢臥燈下，轉塵尾視之，歎曰：「如此人，曾不得四□！」及亡，劉尹臨殯，以犀柄塵尾著柩中，因慟絕。

11 支道林喪法虔之後，精神實喪，風味轉墜。常謂人曰：「昔匠石廢斤於郢人，牙生輟弦於鍾子，推己外求，良不虛也。冥契既逝，發言莫賞，中心蘊結，余其亡矣！」卻後一年，支遂殞。

12 郝嘉賓喪，左右白郝公：「郎喪。」既聞不悲，因語左右：「殯時可道。」公往臨殯，一慟幾絕。

13 戴公見林法師墓，曰：「德音未遠，而拱木已積。冀神理綿綿，不與氣運俱盡耳！」

14 王子敬與羊綏善。綏清淳簡貴，為中書郎，少亡。王深相痛悼，語東亭云：「是國家可惜人。」

15 王東亭與謝公安惡。王在東聞謝喪，便出都詣子敬道：「欲哭謝公。」子敬始臥，聞其言，便驚起曰：「所望於法護。」王於是往哭。督帥刁約不聽前，曰：「官平生時，不見此客。」王亦不與語，直前哭，甚慟，不執末婢手而退。

16 王子猷、子敬俱病篤，而子敬先亡。子猷問左右：「何以都不聞消息？此已喪矣！」語時了不悲。便索輿來奔喪，都不哭。子敬素好琴，便徑入，坐靈牀上，取子敬琴彈；弦既不調，擲地云：「子敬！子敬！人琴俱亡！」因慟絕良久，月餘亦卒。

17 孝武山陵夕，王孝伯入臨，告其諸弟曰：「雖棖桷惟新，便自有黍離之哀！」

18 羊孚年三□一卒，桓玄與羊欣書曰：「賢從情所信寄，暴疾而殞，祝予之歎，如何可言！」

19 桓玄當篡位，語卞鞠云：「昔羊子道恒禁吾此意。今腹心喪羊孚，爪牙失索元，而匆匆作此詆突，詎允天心？」